

„Schönecker Schorsch“

Der etwas andere Newsletter. 03/15. 4. Jahrgang

FWG
Schöneck e. V.

Ei Guuude wie!

Nix los im Dörfche??

„Na jetz hawwer mer des ja gepackt, oder was mahnst du?“ „Wie, wo, was? Klär mich uff, du Schlaubauch, ich kann doch kaa Gedanke lese.“ So hat unsern letzte Schoppe agefange. „Erst biste net da. Sicher widder uff ner Bildungsreis gewese, unn von mir verlangste mal widder Sache, di net gehe. Also was iss, was hawwe mer gepackt?“

„Wusst schon immer, dass de e bissi brauchst unn mich net gleich verstehst“ lacht de Gerhard. „Also du hast ja recht, ich mahn des mit de Eintracht, dass die ja jetz de Klasseerhalt gesichert hat. Unn wenn des ahner vor de Saison gesacht hätt, dass des so gut geht, hätt dem Vorstand unn dem Schaaf jeder die Füß geküsst. Awwer bei dene viele verpasste Gelechenheiten in Richtung Europa iss jetzt fast jeder sauer. Was mahnst du da dezu?“ „Sehe ich ach so. Kennst doch mei Spruch: Immer de Ball flach halte. Die Wahrheit find uffem Platz statt unn abgerechnet wird am Schluss. Es iss halt wie im richtiche Lewe. Zwa Spiele noch unn dann schau mer mal.“

„Mann oh Mann, du wirst ja zum Philosoph. Fast so wie die von de FWG“ sacht er breit grinsend. Die hawwe denen von de Grüne in de letzte Gemeindevertreterstzung ach gesacht, dass mer des Fell vom Bär erst verkaafe kann, wenn er geschosse unn abgezoche iss. Wobei die Idee mit de Bücherei in de Schul ja net schlecht war, awwer jetzt schon mit Geld zu winke, was noch net da iss, des geht ja werkllich net. Da musste selbst die Rote, Schwarze unn Gelwe zustimme. E ganz neues Abstimmverhalte im Schönecker Parlament.“ „Sachlich halt. Was stört dich da dran du Schlaubauch“ sach ich e bissi gereizt. „Rech dich net uff, des mahn ich doch aach. So sollte se immer abstimme, sachbezoch, egal, von wem de Antrach kommt. Weg mit dem ja eichtlich net erlaubte Fraktionszwang. Awwer den gibt’s ja net werkllich, oder?“

„Na, den gibt’s net. Die sinn immer, naja meistens, in de Partie alle einer Meinung. Komisch iss des ja schon. Des packe noch net emal mir zwa beim Schoppe: Du sauergespritzt unn ich pur“ sacht er grinsend.

„Lach net, ich mahns ernst unn de Daniel Kropp sicher aach. Der hat nämlich sei Mandat zurückgegewe. Afach so. Warum, waas mer net so ganz genau unn Gedanke lese kann kaaner.“ „Sich awwer sei Gedanke mache.“

Ja, des scheine die in de große Volksparteie, also die Rode unn die Schwarze sich ach gemacht hawwe, denn nachdem mer sich enn Rechtsbeistand geholt hat, was lobenswert iss, scheine die jetzt aach widder uff die BI Pro Büdesheimer Schloss zugehe zu wolle, denn beide Seite hawwe erklärt, dass die ja Ihr Idee aach noch eibringe könne, in oder nach de Ausschreibung zum Bietungsverfahren.“



„Schönecker Schorsch“

Der etwas andere Newsletter. 03/15. 4. Jahrgang



Seite 2

„Schau mer mal, ob des politische Nebelkerze sinn oder wie ernst die des mahne. Die Zeit wird's weise. Scheinbar sinn se awwer schlauer geworde unn zu dem Schluss gekomme, dass mer so mit angaschierte Bürcher net umgehe kann.“ „Der Ahne merkt's früher, der Annere später“ sach ich nur. Awwer jetzt muss ich fort nach Berlin. Emal die Stadt unn die Eintracht agucke. Mach's gut du Babsack. Enn letzte Schluck aus dem Gerippte unn fort war ich. So, jetzt derf der emal mei Schoppe bezahle. Nix los im Dörfche? Nur scheinbar. Mer wird sehe, was die Zukunft bringt. Lebbe geht weiter unn es bleibt spannend.

Also dann bis demnächst...

Ihne Ihrn

Schönecker Schorsch